

陶雲汀先生奏疏

雲於先生三十歲小像



韓范經緯憲號風轅誠墨彼備新喜淵泯
繼披昂登良臺伊踐陸賢議醇姚嵐謀遠
蕩節越背鎖閨楚典也望蒼生

韶乘月懷輝微及極仁揚滿既不盡晚山
轉送吳蕊深滄流委濤誦懋轉予翠
不致泮青名顯岷阜風澤專橫浩簡台曜
中神蓋然委展體重而威氣和乙善是貴
尚相第禰線然

道光戊子秋

海鹽朱方增敬題



陶雲汀先生奏疏序

唐虞官人之法曰敷奏以言明試以功其時都
俞一堂謨明弼諧無所爲空言見者故曰乃言
底可績自漢以還諸名家集中往往有啟事疏
表至唐陸宣公遂以奏議名其全集由今觀之
諸家無論已若宣公內聖外王之學與伊訓說
命相表裏而言之不竟其用則亦無以明試而
見其言之可績也吾師安化大中丞弱冠登朝
爲名翰林迨改官柏府驄馬巡城出按南漕所
至有聲

容皇帝每覽所奏未嘗不稱善翕然欲大其用

今上卽位首拔公於川東道任俾陳晉臬不兩載遂
開府江南出其所學以幹

國濟民凡所敷陳朝發夕

報可

聖主任賢之誠與公自任之重洵可謂明良際會縱
大壑而翔順風者也公經濟博通言達於行奏
牘必親自屬草在安徽首釐庫款三十年之膠
轄豁然一清以爲吏治綿懾由於賠累牽掣而
不能自拔故於清查後卽明定章程嚴交代裁

捐款禁流攤俾官得自立以專其力於民而吏治以起由是平獄訟嚴緝捕搜廢舉墜表揚忠義更勸民修水利置義倉鰥寡孤獨有養而百數十年之文獻亦就理焉移節江蘇值河漕交敝定議試行海運大挑吳淞江以利農田其餘支河汊港次第浚治復修練湖闢丹徒橫閘通江之路以利漕行皆數百年未舉之庸緝勞於躬不動聲色而措置井然若道光三年皖省被水道光六年淮南北大河兩岸各府州沈蓄墊溺以萬億計哀鴻遍野賴公而甦載在口碑其

還定安集之功雖富鄭公之在青州未足云喻也而其詳皆見於奏議讀者每從邸鈔或文書上下時見一斑而惜未覩其全也

廷錫

事公久

親見公所設施輒請得其彙擇其尤關政治者付之剞劂以爲模楷計摺彙二十四卷題彙八卷凡三十二卷起嘉慶甲戌至道光戊子公年五十古人服官時也而見諸實績者已如此謨明弼諧於斯有徵泰山之雲不崇朝雨徧天下其所蓄積然已記有之可言也不可行君子弗言也可行也不可言君子弗行也則民言不危

行而行不危言竊於公之奏疏亦云然道光八年戊子季冬受業安陸李廷錫頓首謹序

凡例

一奏疏之體向用本章乾隆十三年奉

上諭向來各處本章有題本奏本之別地方公事則用

題本一已之事則用奏本題本用印奏本不用印其
式沿自前明究之同一入告何必分別名色著將向
用奏本之處概用題本以示行簡之意等因遂著爲

令凡外省由通政司送閣爲通本在京各衙
門徑送內閣統爲部本至摺子一項蓋卽古
劄子言事之意在京各官摺子皆貯以黃匣
有密奏則加封粘口外省摺子則一概封口

附錄卷之六 奏疏
一
於封皮上加貼印花外用夾板其體式與題本異大概摺子所陳多係緊要及不在定例之事請自

上裁與奏本畧同故謂之摺奏而題本有恭疏題報之語則疏體也考古人言事之文或稱奏議或稱疏藁今先生是編合摺子題本二項故總稱爲奏疏云

一摺奏言事始於

國初伏查會典載順治十三年

諭向來科道及在京滿漢各官奏摺俱先送內院今後

悉照部例徑詣宮門陳奏其外省所送通政使司題本及在京各官本章仍照舊等因足見奏摺向惟京官科道得用之迨

世宗憲皇帝勵精圖治

召見外官亦往往

賜以摺匣言事由王大臣轉遞其後遂沿爲例徑送奏事處直達

御前實爲我

朝明目達聰綜庶政而急先務之第一大端是編敬本此意故以摺子居前題本列後

一題本多係刑名錢穀典禮一切尋常之事亦
有由奏改題者伏查乾隆六十年

諭留京王大臣等各省尋常事宜從前原止照例題報
近自一二十年以來各省督撫每將例應具題之件
改爲奏摺經王大臣等議歸簡要國家創立摺奏原
爲關係民瘼並一切緊要事宜而設至於王大臣現
改題咨各款皆無關緊要之件其實係重要急務仍
許其隨時專摺具陳等因欽此是題本一項原係奏
疏中循例之件惟查先生任內具題各件多
闡發幽潛之舉如祁門縣許文瑾父子兄弟

廣德州沈千戶父子夫婦涇縣朱儀全家及
貴池馬應魁等江陰邵康公等與桐城之項
黃氏祁門之汪馬氏等殉節死烈事在元明
又如武進陽湖二縣以一案

旌表節孝貞烈三千一十八口上元江寧二縣以一
案

旌表節孝貞烈五百一十二口皆阨窮孤苦沈晦多
年自先生創爲總坊之疏獲邀

恩旨是循例具題之中仍多破格之

曠典其他節孝貞壽及好義各善舉皆足爲人心風

俗之助謹俱採入以昭激勸

一古人奏疏如宋范希文政府奏議分爲四類
包希仁孝肅奏議分爲三十門其次第多不
可知惟明何孟春文簡疏議十卷以歷官先
後爲序按時考事一覽秩然若譚綸襄敏奏
議十卷分閩藁蜀藁薊藁遼藁亦其意也是編
以先生歷官先後爲次蓋仿何譚二公例云
一奏疏每件俱恭載原奉

殊批及

諭旨伏查

欽定四庫全書簡明目錄載雍正九年莊親王奉
勅編次旗務諸書凡奏劄列前

諭旨列後者有

諭行旗務奏議十三卷蓋欲所奏之事始末瞭然是以
挨順編列於每件後恭錄

諭旨又查

憲皇帝殊批諭旨所載臣工奏摺凡二百二十三人每
件亦俱恭錄

批荅於後四庫目錄謂俾知所陳之得失非惟
明燭無疆物來畢照卽累牘連編悉經

丹毫甲乙唐虞三代以來未聞如是之勤政也是編所

載亦敬仿此例云

一會典載辦理軍機處凡

諭旨明降者既述則下於內閣

注云特降者爲諭因所請而降者爲

亦爲

旨其或因所奏請而卽以宣示中外者

論曰內閣奉上

其所奉之年月日擬寫述

旨各載上

諭軍機大臣行者既述則封寄焉

注云或速或密

論不由

內閣明降者爲廷寄徑由軍機處封交兵部捷報遞往其式行經畧將軍都統副都統辦事領隊大臣督撫學政口軍機大臣字寄鹽政關差藩臬口軍機大臣傳諭皆載奉年旨之查原奉年月日

諭旨及

廷寄俱有年月日可查惟

硃批不載年月日今將本省拜發及接到之年月日
先後載明則欽奉

硃批之期總不出中間數日因時考事益昭詳備

一會典注軍機處擬寫

諭旨俟

欽定發下後

特降者卽發抄因奏請而降者卽同摺發抄其餘奏
摺如奉

硃批該部議奏該部知道者亦卽發抄其

硃批覽知道了或

硃批准駁其事或

硃批訓飭嘉勉之詞皆視其事係部院應辦者卽發抄不涉部院者不發抄其

硃批原摺在京衙門之摺卽存軍機處彙繳如各省各城之摺俱卽發還等語以上各件原摺領回凡奉有

諭旨

硃批均已敬謹查明載入惟科道時條奏所奉

廷寄

諭旨無由詳載恭查

仁宗睿皇帝聖訓內所載

諭旨卽有因科道條陳而奉發

廷寄者伏讀

御製序云

實錄人莫見之用是特命館臣分門彙類敬纂成書使
天下臣民共仰

聖訓之文明如天之無不燭也如地之無不載也我
皇考大經大法益昭著於宇宙矣仰見

聖主觀

光揚

烈俾衆共知之意茲查是編有原奉

諭寄未見明文者卽恭照

聖訓所載補入彌徵

聖

聖相承用人行政之實績焉

一奏疏有與別衙門會銜者分列前銜後銜題

本由本衙門主政別衙門例會後銜摺奏會

後銜者亦多惟要件則應會總督前銜其餘

漕運總督河道總督及鹽政會奏之件往往亦列前銜是編於會列前銜各摺有由本衙門主政或于自定稿者則採入其同列前銜而事非本衙門主政及定稿者概不列入以歸核實巡城各摺卽準此例

一 藩臬奉

旨文審案件有督撫督同字樣者仍由督撫具奏藩臬隨同審辦惟先生初任晉臬甫半載審辦欽案甚多有奉

旨專交者有偕巡撫審辦者其初並無督同字樣蓋

特典也今查先生在晉各摺除審係尋常事件未經編入其借撫臣審結而並無督同字樣者亦於每件目錄之下旁注巡撫督審會奏以昭憲體

一會典事例載題本格式每幅六行每行二十

格平行寫十八字

上餘二格以備擡頭如遇三陸頭則出格一字寫

首行列衙門官銜姓名末幅具年月日內外

一式遵行

按奏摺行款亦仿此

是編每行字格擡頭卽

準此式惟每幅不拘六行首行不刻官銜姓名而提揭事目以便檢閱

一題本及摺尾附載部覆於

批諭之後有接連尾頁者有另頁在後者係檢刻時
偶有參差無關體例亦有原奉

批諭及部覆因藁本偶漏尚須查明補入者先生政
事方新俟續刻畫一辦理謹附著於此

碧山李廷錫謹識

奏摺卷一目錄

侍御稿

安之海 謝

叅奏部員忘親戀棧摺子

叅奏河工濫冒摺子

敬陳湖南旱歉情形摺子

請嚴湖南礦廠之禁摺子

叅奏吏部重籤之弊摺子

敬陳三急五宜以禁紅鬍匪徒摺子

請端吏治之源摺子

請復考試教習舊例摺子

緝匪摺子

巡視中城同
滿察院會奏

請立鄉保獎勵之法摺子

緝匪摺子五

巡視中城同
滿察院會奏

叅奏部員忘親戀棧請

旨勒令回籍摺子

奏爲部員親病危急請

旨飭令回籍以宏

聖教事

臣

惟竭力致身義本同符移孝作忠理無二

致未有忘其親而能忠於國者也

臣

竊見新補

刑部安徽司員外郎張師泌係江蘇巡撫張師
誠之後母弟本年六月張師誠奏稱親父張春
苞繼母王氏年俱八旬內外王氏臥病累年不
能挪移一步近來神氣昏散危在呼吸其父因

王氏病重焦急萬分詎逆轉增請假侍疾仰荷
俞允在案張師泌同爲人子王氏乃其親母不應關
切之情反後於其兄聞此急音自應星馳歸籍
以盡子職乃逾月之久猶然安坐補官優游自
得不啻秦人視越人之肥瘠以致物論紛紛羣
相鄙笑目爲忍心害理之人查前此嘉慶十七
年伊父母壽辰曾蒙

賞賜駢蕃

特諭張師誠自福建巡撫任內馳歸作壽彼時張師
泌安坐京師卽有物議此番親病呼吸存亡更

非作壽可比若謂其親病非危急則張師誠受
恩深重卽不應躬爲欺誑而加父母以病劇之名同
室兄弟一事殊情傳諸四方非所以厚人倫而
光

聖化張師泌並非

朝廷不可少之人其官亦非不可離之官是否應
令回籍侍疾之處伏候

皇上訓示施行謹

奏

嘉慶十九年七月十五日具奏本日奉

上諭御史陶澍奏刑部員外郎張師泌親病危急請
飭令回籍所奏殊爲多事張師泌前於引見時朕
因張師誠先有親病乞假之奏當令英和傳旨詢
問據張師泌覆稱伊父母所患病症漸已向愈張
師誠指日來京陛見等語各官員遇有匿喪等事
關係倫常風化言官有所見聞自當據實叅劾若
父母偶患疾病言官卽騰章入告請旨勒令回籍
恐開攻訐之風所奏不准行原摺著擲還欽此

叅奏河工濫冒摺子

奏爲河工濫冒據實

奏

聞事竊臣聞近來河務廢弛歲糜

國帑盈千累萬而河務並無起色皆因該管上司並不認真督辦惟以興工爲遷調之資任意引用私人事前則顛預入奏以諳習河務爲名事後則徇情保舉以河工出力爲言其實投効河工之人不過虛應故事且有安坐未動俟保奏時附名其中即可儘先補用挨次遞陞而所稱

諸習河務者尤多不足信卽如原任河北道張裕慶乃鑽營有名河工作弊之員人所共知者也而河督吳璥亦以諳習河務保請赴工差委

臣伏查嘉慶十四年六月奉

上諭朕前聞廣興出差赴豫時河北道張裕慶有斂銀餽送越境遠迎等情張裕慶以監司大員於欽差過境時並無因公交涉事件輒行前往迎謁其爲逢迎取悅已無可解免況聲名本屬平常專以結交上司爲務原非循吏據供並未斂錢餽送但送廣興土宜物件又屢送酒席卽屬有意交接並

恐有餽送銀兩之事恃無所証冀圖狡飾著革職
研訊等因欽此旋又據漕督馬慧裕等遵

旨覆查張裕慶於借領購備攔黃埧料物銀兩通同
侵虧一摺審出張裕慶於既經丁憂之後乘呂
昌會未到任前一日趕放銀四萬兩侵肥入已
以蔴作銀浮扣價值作抵又將蔴勛攙雜泥土
秤折至七萬餘觔之多統計侵漁銀數七千餘
兩又濫派委員勒薦幕友以致所屬武陟令陳
驥驥逢迎作弊覩官項如私橐侵虧數至鉅萬
是張裕慶之巧侵

國帑貪婪不職顯有明徵並非公過卽使在事乏人亦何至以慣於作弊之人謂之諳習河務乃日前吳墩又以睢工投効人員請照定價交納稽垛核算銀兩照例給與官職是其智與張裕慶之以蔴抵銀如出一轍難保無暗中慫恿情弊我

皇上洞燭幾先當經

敕駁奉

諭之後無不同深欽佩但恐工次陋習錮弊旣深罔知悛改一計未了再計又生將來又必以某處

應請興工某人尤爲出力任情保舉甚至如張裕慶之儔故態復萌仍致侵盜

帑項有興工之名無興工之實而

國家數千百萬有數之錢糧歲填無底之河其流弊伊於何極伏思我

皇上宵旰勤勞推心置腹凡大吏奏請人員多蒙

俞允原以資其勵翼俾收指臂之功在事諸臣應如何感激慎重以期毋負

天恩況河工重大關係漕務暨億萬生靈田廬性命而乃假公濟私顯爲徇濫如此其何以勵當事

而做將來臣擊此情形誠恐貽誤河工謹據實具

奏伏祈

皇上聖明睿鑒謹

奏

嘉慶十九年九月初四日奏本日奉

旨交軍機處存記

敬陳湖南旱歉情形摺子

奏爲敬陳湖南山田旱歉情形請

旨飭查預防滋生事端事竊湖南一省半山半水濱湖之田畏水不畏旱五六月即可收穫近山之田一旱輒槁七八月方收至於深山窮谷地氣較遲全賴包穀諸芋雜糧爲生九月後方收地形既有高低陽雨亦復異宜本年三月以後雨澤稀少雖有得雨之處亦未能十分沾足惟濱臨洞庭湖一帶隄垸及附近省城之長沙湘陰等縣夙稱卑溼俱獲豐收其餘如澧州慈利桃

源安化及寶永所屬皆不免花旱歉收而辰沅兩府爲甚辰州府屬之沅陵瀘谿沅州府屬之麻陽爲尤甚百姓以草木及神仙土充食斗米價錢五六百文不等此時甫屆收穫卽已如此將來冬春以後更不知若何昂貴伏思湖南山多田少刀耕火種之民終歲勤動雖遇有秋之年猶必借助於茶蓼薇蕨最稱艱苦濱湖之田遇豐歲尙可有餘但舟航四達搬盤者多民無蓄聚閒有穀多之家則又貪圖厚價不肯零糶以致近處貧民挑負空囊奔走終日而不能購

買升斗有錢無糴年豐而啼飢者比比然也前
此嘉慶六年省城一帶偶因荒歉卽有奸民喻
次山等乘機劫搶聚衆幾於千百幸彼時卽行
捕獲正法未至釀成事變餘如新化縣之蘇溪
關益陽縣之桃花江等處每遇荒年多有無賴
之民沿江阻守不許米船流通閒被搶奪此往
事之可懲者也況辰沅所屬逼近苗疆民情浮
動尤爲可慮卽臣所居之安化縣亦與辰州接
壤嘉慶十二年五六月間因值旱乾卽有放火
搶物之事如小淹河曲龍塘洞底等處被燒之

家甚衆報官不究致有被燒至兩三次者居民
相聚鳴鑼巡守此臣本籍見聞較切恐他縣類
此者尙多或因山僻路遠民隱無由上達竊思
我

皇上保赤誠求惟恐一夫不得其所卽如本年直隸
之大興宛平春收不過二三分而地方官竟報
八分仰荷

訓飭查明在案此在

輦路所經尙有諱飾何況遠省若偏僻之處卽本
省上司尙恐耳目難及非各州縣自發天良據

實舉報先事綢繆則事變之來往往由小致大
雖一隅中之一隅安可不預爲防也應請

敕下該地方官速行出示凡有穀之家於零星糶買
不得阻滯其據險遏糶如蘇溪關等處卽行拏
辦俾穀米流通仍嚴禁盜賊有倡意劫搶者立
卽懲治毋稍寬縱庶不致別生事端而旱歉之
民復登衽席矣臣有察訪本籍之責旣有所聞
理合據實具

奏伏祈

皇上聖明睿鑒謹

奏

嘉慶十九年九月十七日具奏本日奉

諭旨一道交湖南巡撫查辦

請嚴湖南礦廠之禁摺子

奏爲奸民盜開礦廠請

旨嚴行封禁事竊臣聞湖南辰州屬之沅陵縣有地名大油山在清浪灘之上山險水惡數十里人烟絕少最利藏奸前年此山偶出金礦輒有奸民乘機盜挖數月之間聚衆數千地方官往捕當經嚇散而根株未靖仍有偷挖之事本年辰沅飢饉百姓乏食咸以此山有金可採冒死爭赴併有他處聞風而往者日聚日多其勢復將犯禁查大油山蕞爾一區爲山甚小無論礦竭

下
之日難於遣散而此時辰沅荒歉穀米騰貴本
地之民尚且乏食安能供此日益月增之衆况
礦徒兇橫者多往往不顧身家性命沅陵偏近
苗疆山深地阻聚此千百無藉之徒於險惡之
區爲聚而難散之勢其爲害誠非淺鮮現雖有
官駐守誠恐員微力弱難資彈壓應請

敕下湖南巡撫速飭該府親往設法遣散毋使奸民
嘯聚致釀事端仍將此山永行封禁以絕希冀
之心而杜將來之患再者湖南所屬如安化攸
縣新化邵陽武岡新寧東安辰谿瀘溪石門慈

利永定桂陽桂東臨武各州縣向產鐵礦有題
明開採者亦有私行開挖者因係內地尙無妨
礙然礦洞幽深曲折易於窩藏盜竊且穿崖越
嶺長至二三里及四五里不等往往洞口開於
此山而偷挖彼山之礦甚者斷山截脈壞及墳
塋住址殘毀可傷爭端易起聚衆械鬪涉訟釀
命者不一而足竊思此等礦山雖未能盡行封
禁亦宜妥爲防範毋使滋生事端應并請

賜諭該地方官剴切出示毋許偷挖如有鑿毀人家
墳地及窩藏盜竊者從嚴辦理有犯卽懲於以

澤枯骨而靖奸藪地方幸甚臣爲預防曠徒爲
害起見是否有當伏祈

皇上睿鑒謹

奏

嘉慶十九年九月十七日具奏本日奉

諭旨一道寄交湖南巡撫查明封禁

叅奏吏部重籤之弊摺子

奏爲縷陳吏部重籤之弊請

旨查明嚴禁以肅選政事

臣

惟立法期於畫一法不

一則弊竇叢生吏部總司選政近年來檢舉之
案不一而足而且爭缺之案有之配籤作弊之
案有之然或意見偶歧或防範不及未有明目
張膽別立一法以待弊混之來如重籤之甚者
也其法於掣籤既定之後將續到應附在後之
員重爲設籤令其補掣如掣得第一名則插入
初掣第一名之後謂之重一籤掣得第二名則

插入初掣第二名之後謂之重二籤以有定之籤復作爲無定之法巧爲鑽入不公孰甚吏部向無此例聞自嘉慶十年捐納道員呂昌會始爲開端現在投供候選人員內卽有補掣重籤之張毓秀一員查張毓秀係嘉慶九年舉人十三年議敘縣丞十四年始改歸知縣補掣重籤第二名插入十三年議敘知縣第二名之後此外補掣重籤如張毓秀者恐復不少非澈底查明無以公選法而杜弊端伏思部務一切以例爲主今重籤非例所有捨例言案其弊一也呂

昌會以捐班而掣重籤張毓秀以議敘比照而掣重籤既無專條又無限制人人可以比照即人人不可以比照可以比照既開濫倖之門不可以比照勢必起賄託營求之漸其弊二也掣籤之員每班或數人或數十人多者或數百人一經掣定人心帖然今既補掣名雖重一其實初掣第二名以後盡爲所壓名雖重二其實初掣第三名以後盡爲所壓後來居上於理未平且聞呂昌會亦係掣得重三名次與張毓秀之掣重二相似以滿筒之籤並不掣向稍後形跡

疑似之間易滋物議其弊三也掣籤以文書到齊爲憑例應奏定限期踰限不到卽無庸查辦其行查及續到人員祇准附於初掣人員之末原以昭畫一而防怠玩今以上年之案遲至次年始到復插入上年籤掣前三名之內是吏部奏定期期全不爲憑而踰限不到者轉得補掣在前易啟趨避取巧之端其弊四也重籤之掣或以遺漏爲名或以錯誤爲名不知遺漏錯誤在吏部則應自行檢舉在別部則應處分別部在本員則爲自行貽誤更應附在末後方昭平

允何得設此活法預爲遺漏錯誤地步其弊五也現聞豫東事例報捐人員難保無冊結遲延及遺漏錯誤之事若似此紛紛比照書吏人等得以上下其手勢必藉端訛索又釀事案不可不早爲滌除應請

敕下該部查明從前掣重籤者共有幾員詳悉開列事由應否更正伏候

聖裁其重籤名目請嗣後概行禁止倘有本員自行遺漏錯誤者祇准附於初掣人員之末若遺漏錯誤與本員無干卽一面將遺漏錯誤之官吏

臣等謹將
卷一
參處一面專摺具奏請

旨定奪不得牽引成案率行比照庶法歸一定而吏胥不能爲奸矣臣爲防弊起見是否有當伏祈
皇上睿鑒謹

奏

嘉慶十九年十月十九日具奏本日奉

硃批所奏甚是吏部堂官各矢天良明白回奏欽此

旋據覆奏重籤雖有數員尙無弊竇嗣後應請載入例冊以歸畫一而杜弊端

敬陳三急五宜以靖紅鬍匪徒摺子

奏爲紅鬍匪徒日熾敬陳三急五宜以殄渠魁而
弭後患事竊臣聞安徽之廬鳳潁亳河南之南
汝光陳等處向有匪徒名曰紅鬍子其兇橫不
法之狀自己久達

天聽臣近日細加訪察不但緝捕難於得力且有兇
焰日張大非昔比不可不速爲殄除者謹將急
切情形併緝捕事宜一一爲

皇上陳之

一匪徒前此猶散而今則日聚也查紅鬍原係

白蓮教匪漏網之人間出偷竊身帶小刀爲
防身之具人以其兇猛故取戲劇中好勇鬪
狠面掛紅鬚者名之然匪徒聞知猶以爲怒
也近則居之不疑成羣結隊白晝橫行每一
股謂之一捻子小捻子數人數十大捻子
一二百人不等恃其羽翼或劫人貲財或搶
人妻女或當街臨市而喝人脫去衣裳且剜
人眼睛謂之滅燈刀扼人頸謂之禁聲據險
扼隘突起搶奪謂之打悶棍皆以夥羣日衆
故爾肆行無忌此殄除之當急者一也

一匪徒前此有黨而今則有目也查匪徒零星藏匿彼此聲息不通猶易緝捕近則公然具有頭目羣相護從聽其指揮每要約百姓人家具備酒食蜂擁而至飲啗狼藉食畢放礮三聲而去此風河南之息縣光山正陽羅山汝陽項城爲尤甚其在逃未獲之王妮子實卽頭目而地方官捏稱爲從者也其在安徽者則李東山馬大振二人最爲出名劇匪現在藏匿阜陽縣境內每人手下約有千人此殄除之當急者二也

一匪徒前此猶畏官而近則官反退縮也查此等匪徒皆因十年前之地方官因循貽誤養成後患此時徒類既衆益復膽大妄爲其器械則有擡鎗兩人共舉一發可傷十數人不祇掖刀已也地方官每有緝捕要犯不敢明拏非用數百金購線不能獲一人若僅帶差勇搗其巢穴則匪黨出入皆用擡鎗不唯恐傷良民卽官役受傷已成激變各上司帶兵入境一兩月不能獲犯而地方官已筋疲力盡惟有隱忍不言顛預了事以圖目前之苟

安而已匪徒悉此情形是以愈無忌憚此殄除之當急者三也

一靖匪徒宜官民一心也查匪黨雖多總不及良民十分之一徒以地方官吏養患已久告之於官官未必理而匪徒因此懷恨其受害更深即使官爲辦理而吏役之使費衙門之陋規已攫其貲產之半矣是以甘心求免於匪徒而不肯更受官吏之害此實現在各省患盜之通弊欲求除莠安良非官爲百姓大作主張不可

一靖匪徒宜上下一心也州縣官號稱民牧祛除害馬是其專責然必上司賞罰嚴明始能令下如流若費力不討好其能實心任事者有幾臣聞豫省紅鬍其初本未猖獗自恩爲巡撫但知勒索州縣地方官畏縮不敢舉辦以致釀成事變如王勝子一案公然抗拒官兵亦未大加懲創以致匪徒罔知顧忌此時勢焰漸成地方官未免畏首畏尾非上司爲州縣大作主張不可

一靖匪徒宜鄰境一心也查匪徒往來無定此

拏彼竄其聚處多在鄰省交界及各州縣接壤之所此等處所名爲三不管每有失事案件地方官輒互相推諉以圖免處分而盜賊卽利此以爲窩穴查例載凡交界地方失事無論隔縣隔府隔省一面差役往拏一面移文關會協緝倘有疎縱牽掣交部分別議處是此等藏賊之所例有專條豈容推卸至若大捻匪徒尤非一州一縣所能捕淨雖非所屬地方亦應三面會合文武協力同時掩捕俾巨惡就擒而後餘匪可挨次而理矣

一靖匪徒宜另置重典也紅鬍匪黨帶刀出入本易辨別徒以所犯劫搶百姓畏其結怨多不報官立案偶爾緝獲既無死法及至傷人殺人則又慮及處分將就了事並不提出紅鬍二字致與平民鬪毆之案無異無所懲創伏查現行條例所載如川省咽喉匪浙西棚民臺灣不法棍徒以及回民搶奪苗蠻仇殺江南沙民械鬪之類皆因地制宜別設專條今紅鬍之害倍甚於此應請嗣後安徽河南等處匪徒犯事審係帶刀者申明從重辦理毋

得僅以順拔小刀拒毆適斃爲辭庶隨案懲辦而匪黨之勢亦可漸殺矣

一靖匪徒宜平鹽價也查安省之潁亳豫省之汝光一帶例食淮鹽現在每觔值錢四五十文不等長蘆私鹽每觔不及半價是以居民利食私鹽其間私販鹽梟實繁有徒而紅鬚則爲之護送每車私鹽索錢二百文每日私鹽不啻百輛賭博酒肉之費皆出於此鹽車不足乃出而劫搶竊思淮蘆各鹽銷售原有定地若稍爲調劑或將淮鹽引地酌撥蘆網

而以淮綱之稅酌攤蘆引之內一轉移間私
鹽不緝自淨但此事非一刻所能妥議且必
紅鬚先淨而後可以辦理否則若輩失此口
食之貲其搶掠更急惟善後之策似宜籌畫
及此爲久安長治之計耳

以上情形雖非起自近日而近日更甚誠宜及
早綢繆庶不致釀成後患爲此謹

奏伏祈

皇上睿鑒謹

奏

嘉慶十九年十一月二十一日奏本日奉

上諭軍機大臣等御史陶澍奏紅鬍匪徒日熾敬陳
緝捕事宜一摺河南南汝光一帶以及安徽潁亳
等處向多紅鬍匪徒屢經降旨飭緝總未斂戢今
據該御史奏稱近來日聚日多橫行益甚每一股
謂之一捻子小捻子數人大捻子一二百
人不等成羣結隊公肆搶劫或奪人貲財或搶人
妻女甚至挖人目睛且有頭目指揮河南之息縣
光山正陽羅山汝陽項城爲尤甚其在逃未獲之
王妮子卽屬頭目而地方捏稱爲從其在安徽者

有李東山馬大振二人最爲出名現在藏匿阜陽縣境內每人手下約有千人州縣顛預不辦等語除莠安良爲地方官專責若畏難不辦日久養癰益滋隱患該御史摺內指陳人名地名鑿鑿有據其言必非無因且該匪徒夥黨約有千人則在逃未獲之逆犯祝現劉成章等難保不投入其中冀延殘喘著方受疇胡克家各遴派委員在河南息縣等處安省阜陽境內將王妮仔李東山馬大振三犯按名捕獲審明嚴辦並密訪各犯有無漏跡在內者設法查拏毋稍疏縱再本年安省潁亳一

帶收成歉薄飢民甚多胡克家尤當密諭委員持
以鎮靜務須不動聲色將指拏匪徒逸犯嚴密蹙
緝首犯就獲則其餘夥黨自必畏懼解散不可張
皇海捕致令夥衆驚擾激成事端此爲至要欽此

二十年河南省拏獲馬三振卽馬大振暨李東
山搶劫案估各案業業將馬三振擬斬李東山
擬絞二十一年江南亳州拏獲王妮子擬斬餘
匪發遣

請端吏治之源摺子

奏爲州縣之錮弊日深州縣之疲頑有自請治其源以端吏治事伏見我

皇上兢兢業業無刻不以吏治民生爲念而尤以因循怠玩揭中外臣工之積弊凡有人心自應洗滌肺腸仰承

聖誨乃近日風氣因循者尙復因循怠玩者依然怠玩卽如虧空之案甫經查辦而新款又有虧空科派之案屢經懲創而外省猶多科派此固由州縣官之昧良而亦其源未治也夫所謂其源

者何督撫藩臬各上司是也上司不能正己率屬則不肖之州縣既有所挾持以無恐而循良之州縣又有所牽掣而不能前弊端不一臣請摘其尤甚者爲

皇上陳之

一勒接交代也一官纔蒞豈能卽搬庫項無如前任虧空已多上司懼干失察之咎必欲新官接受少者數千多者數萬桃僵李代不接不能到任其有稟揭前任虧空者則必致上司之隱怒或以才力不及而調簡或以辦事

迂拘而改教甚至別假事端劾而去之是以甫登仕籍卽入債鄉始基不立而望以清廉難矣

一多攤捐款也州縣廉俸有數乃無端藉公科派其名曰籌補曰幫助曰貼賠曰使費總名曰捐款因其出之自公故不甚愛惜每由首府首縣墊出然後攤派各州縣每歲數百數千兩不等各州縣力不能應有時延緩則上司卽於其徵解錢糧時准作某項捐款而錢糧則批令另解是以

國家惟正之供抵私款也虧空之積由此深矣

一預備賞號也凡上司有事或練兵或巡邊或公讌則州縣預備賞封及緞疋銀牌之類上司隨手揮霍無非慷他人之慨然當場進賞猶可言也有等上司竟將賞項先收入已臨時自行發出於是家人吏役節節又添規費出數少而入數多而賞號之名適足爲巧取之目矣

一派辦供給也凡上司入境出境送往迎來則有夫馬有酒席有站規有門包其同城居住

者則有輪月之供給有包月之供給甚至一窗一扉一厨一厠皆於附郭之州縣是問復派他處之州縣協濟焉此等供給名目近來頗知斂戢然尙未能盡革也

一壓薦幕友也州縣事務較繁刑名錢穀原不能不借助爲理乃一官尙未到任而幕友之舉薦已多其賢否無從辨也但擇其情面較大者而受焉道府所薦者旣受則藩臬所薦者不能不受督撫所薦者更不敢不受且有並未見面但送束修者謂之食坐俸此所以

人愈多費愈繁而事愈勞也

一 濫送長隨也長隨不必皆上司舊人或夤緣
上司之親串或鈎結上司之門丁邀求吹薦
在上司不過泛然一語而州縣則以上司所
薦而不敢辭長隨又以薦自上司而罔所忌
未離省會早已百十成羣及至抵任人浮於
事既難人人飽慾必至事事生端或外勾吏
役或內通劣幕百弊自此叢生矣

一 委員需索也州縣固多無良委員豈皆可靠
假以耳目易致需索乃一紙文書可辦之事

動輒派委數員在上司不過爲調劑閒官起見不知一來一往盤費不貲在委員所得無幾而州縣之累已深甚至因饋送不遂而簸弄是非則掣肘之事更多矣

一提省羈留也州縣各有職守不容曠廢即使因公晉省亦當飭令速歸乃或因細故而提省羈候轉委他人前往署事迨一年半載之後始令回任以致無累者生累有累者增累不思州縣果不勝任卽應叅劾徒令往返奔波是重其敝也安能不虧空乎

以上數條督撫藩臬中雖賢者或亦不免至於
作福作威不公不法橫索屬員者則又不待言
矣夫今之州縣疲精於奔走承應之中救過於
紙札文書之上十人而聚無語田桑者焉百人
而聚無語教化者焉其於百姓則魚肉也百姓
視之亦幾虎狼也抑思果何由而致是哉各省
大吏受

恩深重若不正本清源以身率屬而徒以不肖之州
縣爲解恐吏治終無起色也

臣仰觀

聖人宵旰焦勞未敢緘默謹據實縷陳伏祈

睿鑒訓示謹

奏

嘉慶十九年十二月初七日具奏本日奉

上諭御史陶澍奏外省州縣積習請治其源以端吏治一摺各州縣爲親民之官惟在牧養有方教化有法斯吏治端而民生日裕乃因循疲玩相習成風若不亟加整頓何以革敝習而勵官方如該御史所稱州縣交代虧空上司懼干失察之咎勒令新任接收又藉公科派有籌補幫貼使費等款及預備賞號派辦供給歷薦幕友濫送長隨並委員

需索提省羈留種種苦累皆各省實在情形總緣
外省大吏不以吏治爲事其始稍開其端久之揚
波逐流日甚一日陋習相沿遂至成爲錮弊雖有
一二自好之士亦不能卓然自拔今欲清其源責
在大吏著通諭直省督撫藩臬等務各洗心滌慮
飭紀整綱伊等養廉優厚一切賞需供頓不可絲
毫累及屬員其州縣因攤捐羈候橫被苦累之處
查明悉予裁革俾賢能者得以自立中材以下亦
無所藉口庶幾大法小廉吏治日有起色以厚民
生以興民行胥於此端其本焉欽此

請復考試教習舊例摺子

奏爲請復考試教習舊例以杜牽混而專訓課事
竊惟八旗各學教習向由禮部奏請

欽派閱卷大臣會同監試御史糊名局試秉公甄錄
投考則有印結以防冒倩已取則加覆試以對
筆蹟所以重訓課而嚴弊混法至善也自嘉慶
十七年禮部議改於鄉會試落卷內挑取將考
試教習之例停止遂至辦理參差多有格礙伏
查各學教習之設原以教育八旗子弟非祇爲
應試人員增一出身之路也其間自不容有曠

學之時從前考試多係留京諸生有志赴考是以一經取錄卽在部候缺至鄉會試挑取則揭曉未經中式紛紛回籍者多且有視爲小就而不願留或身病親老而不能留遇有缺出每至傳補無人一傳不到至於再傳再傳不到至於三傳三傳不到始傳其次應補之人而其人又或屢傳不到展轉遷延經時歷月則八旗子弟之曠學者多矣而且挑取各卷多有已取教習膳錄及在各衙門行走之員禮部拆閱彌封時例應扣除如癸酉鄉試所挑教習五十名經禮

部扣除三十三名榜中填列者僅十七名期閱
三年人數難敷於是有越次傳補及別項借補
之事書吏得以從中作弊而物議亦自此滋矣
竊思禮部改考取教習之例於落卷挑取名曰
防弊實爲省事起見不知考試各有用處教習
之與舉人進士事不相侔豈宜省爲一場致滋
牽混至若防弊之法則凡考皆不能無弊不獨
教習爲然司事者宜因考而防弊不宜因弊而
廢考況乎貢監試卷向例祇戳印皿字號今因
挑取教習不能以援例之貢監充選又於卷面

別印正字則冊籍既繁辨識尤易似於防弊之法反覺有疎也現距丙子鄉試之期尙遠人數無多將來又不免有越次傳補及別項借補之事恐滋弊混應請

旨飭復舊例仍行考取之法俾八旗官學不致懸缺待人各學生得以勤習功課於

國家教育八旗之典方爲有名有實臣管見所及
伏祈

皇上訓示施行謹

奏

嘉慶二十年正月二十九日具奏本日奉

硃批大學士軍機大臣英和劉鐸之會同該部議奏

欽此

旋經會議應如該御史所奏所有八旗官

咸安宮學宗學覺羅學

景山學各漢教習俱照例另場考試其現任小京
官及各衙門行走人員併取過曆錄校錄無論
已補未補仍不准與考俱於同鄉官印結內聲
明庶不致一人兼估兩途奉

旨依議

緝匪摺子

巡視中城同
滿察院會奏

奏爲拏獲活埋最要犯拏之兇手及逆匪家屬併
形跡可疑之雇工請

旨交部辦理事竊

臣

等以逆犯逃匿未淨屢飭司坊

官嚴密查拏毋得始勤終怠茲據揀發指揮阮
文燮副指揮張效高稟稱訪獲民人徐七曾經
藏匿最要逆犯董伯旺之子董山兒並據供出
董山兒已爲伊舅郝成瑞活埋致死臣等當飭
該員飛赴黃村會同該地方官立拏郝成瑞指
出活埋處所撥役看守將郝成瑞徐七帶到又

另案緝獲已正法宋進耀之子宋六及在祝現
家傭工之扈明柱一併敘供呈解到城臣等提
犯親訊據郝成瑞供稱年四十五歲宛平縣人
在黃村當兵上年因事革退本名吳四過繼與
丈人郝四聰改姓郝的郝四聰有女四箇我女
人是大的那二妹子嫁與董伯順爲妻董伯順
死留下一子山兒我妹子又招贅楊姓爲夫楊
姓就隨山兒的姓改名爲董伯旺將山兒做他
的兒子前年九月後山兒跑到我家暫住去年
正月我三妹夫郎八向我商及把山兒送給他

夥計徐七爲子二月初間徐七同郎八來家問
及山兒來歷我說曾經本官問過不是董伯旺
親子釋放了的事我一面承當徐七方肯領
去到十月內有官人到郎八家查問山兒不見
就去了徐七說查拏得緊恐怕惹事要我把山
兒領回這月十一二內徐七叫我在吳家村南
頭等他定更時候徐七將山兒送到我把碗鹽
滷與山兒喝他不肯喝我就將他拉上馬去到
南沙隴地方先把帶子套在他項脖子上用沙子
塞在他口內他就動不得了
我將沙子蓋著把

他活埋了是實詰以是否入教從逆藉此滅口
堅不承認問以董伯旺下落稱自前年九月入
城後並未看見又訊徐七供係大興縣人在吳
家莊種地度日曾與郎八夥開炭窑郎八現被
順天府拏去餘供與郝成瑞同又訊宋六供係
宋進耀之子與要犯支進才親表弟兄同村居
住又訊扈明柱供稱曾同要犯小王二及正法
之李奉全在祝現家傭工詰以支進才現在下
落亦堅稱不知該犯等均係最要犯中親戚鄰
夥所供情節誠恐尙有不實不盡之處臣等衙

門例無刑訊相應一併請

旨敕交刑部分別嚴審辦理再揀發指揮阮文燮副
指揮張效高自揀發來城自備貲斧當差於上
年十月內兩次協同番役拏獲逆犯賀士成並
入教之賀得安張士平張安貴等四名又拏獲
教匪蘇建德及已正法賀起雲之妻賀蘇氏從
逆餘匪張俊梁梁氏四名口均經

奏明奉

旨交刑部嚴審等因各在案該二員効力年餘尙知
奮勉緝拏匪徒已有二案前後獲犯共計十餘

名之多伏查前奉

諭旨五城揀發人員如有出力者准各城御史呈奏
理合遵

旨聲敘案由可否量加鼓勵之處出自
皇上天恩爲此具

奏伏祈

睿鑒訓示謹

奏

嘉慶二十年二月初二日具奏本日奉

旨郝成瑞等交刑部審訊欽此

旋經刑部審結郝成
瑞擬斬徐七擬徒

請立鄉保獎勸之法摺子

奏爲請立鄉保獎勸之法以專責成而收實效事
竊惟除莠安良莫要於保甲我

皇上夙夜勤求爲閭里計安全屢次

諭地方官實力舉行現在各省因保甲而查出匪類
者頗多如孝義廳截擊教匪出力之鄉約項三
太范明詳韓興棟等業蒙

恩旨賞給八品頂帶各處聞風鼓舞自不致視爲具
文矣惟是法立弊生必須得人而理始能垂諸
久遠查保甲之法鄉與城不同在城者十家爲

甲則有甲長在鄉者村自爲保則有保長甲長所管無幾且在城市耳目較近易於稽察若鄉保所管常數百戶千戶其距城近者或數十里遠者或一二百里鞭長莫及全賴保長得人方能助官爲理向來保長由各鄉公舉殷實老成者承充額殷實老成之人避此役如蜂蠶而承充者多係無賴假以耳目往往借端生事甚至包庇盜賊爲害良民如前年直隸省趙勤一案因編查而勒索以致釀命是其驗也所以然者鄉保無庶人在官之食而有終年奔走之勞且

呈冊入城則有費官府下鄉則有費承役脫役則又有費一切呵謦責辱保長皆先嘗焉彼殷實老成之家平時畏懼盜賊控諸官官未必理也及身充保長則官反得加以縱盜之名而遂其訛索轉不若無賴者當之猶無家可破而有利可圖也是以每遇新舊更替之際胥役必多舉殷實老成之家乘其求免情急以邀利而殷實老成之家亦情願用錢求免不願出而承充者誠畏其累而賤其役也然則欲奉行得實必須殷實老成之人爲之欲得殷實老成之人必

有所勸以忘其勞而後可伏查各衙門書吏五
年役滿得考送爲吏員若鄉保果能得人其勞
績自不亞於書吏合無仰懇

敕下各省地方官除在城之十家牌甲隨時多有更
換無庸議外其鄉村之保長尤關緊要宜酌定
五年爲限以專責成而嚴稽察五年之內其境
內盜賊衰息詞訟稀少者詳明上司給與獎賞
其有分年輪充難限以五年者各聽其便但令
役滿之際諸事妥協亦應量給花紅或將別項
徭役酌免一二年以償其勞各州縣仍當加以

體卹毋輕責辱以養其廉恥而鼓其心志並嚴
禁胥役勒索規費俾殷實老成之人樂充保長
不特奉行得人於鈎稽可期核實而型仁講讓
之風亦由此而興矣臣愚昧之見是否有當伏
祈

皇上睿鑒訓示謹

奏

嘉慶二十年二月初九日具奏本日奉

上諭御史陶澍奏請立鄉保獎勸之法一摺直省各
州縣編排保甲原應慎選保長俾司稽察嚴禁胥

役訛索不得視爲賤役令無賴之人承充至於城鄉地方雖遠近不齊其分甲設立門牌甄別良莠規制則一亦非鄉保之責獨重若比書吏役滿考選吏員之例給予獎賞不特人數衆多礙難辦理且此等鄉曲小民亦豈能明習吏事濫登仕籍該御史所奏迂闊不可行原摺著擲還欽此

緝匪摺子五

巡視中城同
滿察院會奏

奏爲拏獲入教知情匪犯請

旨交部審訊事據揀發副指揮張效高稟稱帶同眼
線拏獲教匪劉七陳四孫十等由坊詳解前來
據劉七卽劉啓武供係宛平縣人年四十歲現
在天宮園居住哥哥劉啓文是劉呈祥徒弟我
拜哥哥爲師學念真空家鄉無生父母八箇字
十八年九月十三日我哥哥同杜張五王林王
秀入城滋事令我在太平莊看守王林的家眷
陳四看守杜張五的家眷王五看守王秀的家

眷並叫我們接應河南滑縣的人馬見面時彼
此念真空爲號後來河南的人未見上來我哥
哥死在城內我於十七日就走開了又據陳四
供係宛平縣太平莊人年二十六歲十四年二
月內有賀文隴的母親賀老媽媽叫我入榮華
會不到三天我就出來了十八年九月十四日
有杜張五說要進城做小買賣叫我與他看家
杜張五的女人是乾媽向我說這兩日河南
的人馬要來了到十五日我乾媽給我刀一把
布一塊叫我進城找尋杜張五等我把刀布裹

在衣內走到南西門城門已關我就走回到新莊地方把刀布拋在荒草地內仍然傭工做活又據孫十供稱年二十九歲住居太平莊在城內作鞋靴我與劉七從前認識會與他拌過嘴因此妄扳我實未入教我哥哥孫九分居已久他入教與否我不知道等供查劉啓武一犯入教知情業據供認不諱惟孫十先據劉啓武供稱係賀文隴徒弟其兄孫九係孫起祥徒弟均曾得受僞封進城滋事等語旋即翻供自認妄扳陳四所供亦忽認忽翻情詞閃爍

臣

衙門例

無刑訊應一併請

旨交刑部審訊辦理再揀發副指揮張效高自十八年冬揀發來城曾同揀發指揮阮文燮拏獲匪犯五起俱經

奏交刑部審明定擬在案茲又獨自拏獲一起合並聲明爲此謹

奏伏祈

皇上睿鑒謹

奏

嘉慶二十年八月初九日

夾片一件

再_臣等正繕摺間據該棟發副指揮張效高稟稱續將孫九拏獲尙未訊供_臣等查孫九係已正法田馬兒供出之犯是否正犯俟該坊訊供後_臣等卽咨送刑部審辦理合附片

奏

聞謹

奏

嘉慶二十年八月十二日報到奉

上諭劉七陳四孫十俱著刑部嚴審劉七卽劉啓武

據供稱伊兄劉啓文曾拜劉呈祥爲師隨入禁城
滋事劉呈祥現在何處潛匿伊必知情向其嚴切
跟究毋任諱飾陳四供出約伊入會之賀老媽媽
及給伊刀布之杜張五之妻併著訊明緝拏究辦
孫十是否劉啓武妄扳抑係從逆匪犯伊兄孫九
續經拏獲一併嚴確訊究副指揮張效高指揮阮
文燮前後拏獲各犯著刑部查明是否俱係正犯
擬何罪名開單具奏欽此旋又於九月內緝獲逆
犯任士貴一名交後任辦理十月十一日奉
上諭揀發正指揮阮文燮副指揮張效高前後緝獲

逆案匪犯十餘名茲又拏獲任士貴一犯緝捕尙
屬認真阮文燮張效高俱着加恩儘先補用欽此